

## Nyau-Lay-Byin Nu Maria a Labau Lam ( daw 5 )

Nawku hpung a labau lam hpe hkap madat la na ten bai du wa magang nga sai hte rau daini na lamang hta, Shiga madat ni kawn hpyi shawn da ai, lai sai lamang hta na la lu sai, Yangon Sasana, **Nyau-lay-byin** mare na, **Lourdes** Nu Maria Lung pu byin pru wa ai lam hte seng nna, Wa Jau Simon Thin Mg ka lajang da ai hta na, yawng a matu akyu tai u ga yaw shada let, matut gam garan ya mayu n ngai.

Nu wa hpu nau ni, lai sai lamang hta, Yawnhkyen myit kaji nga ai kareen dingla Pu-Lu gaw, lana mi na ten hta mau hpa yup mang mu nu ai. Yup mang hta, moi shi Bukda makam masham hta naw nga ai ten na, shi a hpung gyi shi a shawng kaw tsap taw ai hpe mu nna, ngai a madu jan gara de rai sai kun? Ngu san ai shaloi, hpung gyi gaw, na a madu jan, **ahpraw nsam nga ai gumra (4)** shakap da ai gumra wan leng ahpraw jawn nna, lahta ningtsa de woi la hkrum sai lam na la lu saga ai rai nga ai. Slg Pu-Lu gaw makam masham n nga ai shi a gahkau gaw gara de rai? Ngu san ai shaloi, shi gaw le hkan aw ra hkan dam hkawm sin hkawm nga ai, ngu tsun nna, hpung gyi wa, mat mat nu ai. Slg wa, shi a mau hpa yup mang hpe san yu ai shaloi, shi a madu jan gaw sumsing mungdan de du nhtawm me, shi a gahkau gaw nga rai mung kaw naw nga ai lam chye lu nu ai. Ningrum ningtau jan n nga mat ai hpang, Shan a majaw makam masham de shang wa ai asak (75) ning rai sai dingla manang wa hte, jahpwt shagu rau rau sha, Nawku Jawng sa rai, manang tai taw nga sai. Shan gaw hpa jinghku mung ndaw ai, raitim, shan shada da hpu nau majing zawn sha hku hkau nga masai. Shan hkawng hta na langai mi gaw, myi nau nmu ai, bai langai wa gaw na nau nna ai lam chye lu ai.

Ya na zawn myi nau nmu ai hte na nau nna ai yen rai tim, shada da grai hku hkau mat nna, pyaw taw nga ma ai. Shan a hku hkau ai ladaw gaw (10) ning lapran daram sha re, nga ma ai. Sak kaba wa sai hte rau, shan gaw, gade nhkran ai, shawng hpang rai si mat wa sai rai nga ai. Mau hpa gaw, ndai kareen dingla yen gaw, machyi ai mung rau rai ma ai da. Shingrai, shan machyi kaba sawng taw ai ten, Jau Francis mung sasana gawan gatsan nna, bai du wa ai hte hkrak rai, shan nga ai **Muk-hka-mu** mare de ding tawng sa nna, Sakramantu hpe jaw ya sai. Jau gaw shan hpe

n gun jaw da nna, shi a jawng de bai wa sai. Hpang jahpawt hkying (8:00) am ten hta, slg Pu-Lu n nga mat sai lam shiga na lu nu ai. Ndai Slg Pu-Lu nsa garai nhti shi ai ten hta mung mau hpa mabyin ni byin ai lam labau hta daini du hkra mu lu nga mali ai. Dai gaw hpa ta nga jang, nsa garai nhti shi ai shana yup tung loi lai re ten hta, shi a nawku tawn kawn nna, Chyoi Pra hkum sharawt ai shaloi dum ai ding si nsen ngoi gadu ai hpe na lu ma ai da. Minit (2) ram na hkra ngoi ai, nga ma ai. Nta kata kaw nga taw ai ni mung dai nsen gaw nta kata kaw na ngoi ai nsen re, nga tsun nna, yawng rawt dum wa masai.

Makau hkan na htingbu htingbyen ni mung, ndai nsen hpe slg Pu-lu a nta n gaw kawn ngoi ai re, nga nna, tsun taw nga masai. Dai dingsi nsen ngoi zim ai hte slg Pu-lu a nta kata kawn nhtoi shingkang langai mi pru wa nhtawm me, nta makau na, hpun langai a makau kaw mat mat ai lam tsun gajai nga sai rai nga ai. Ndai zawn mau hpa mabyin ni byin pru ngu ai hpang, jahpawt nhtoi san wa ai **aten (7:00)am** ram hta Slg Pu-Lu Madu kaw yup pyaw mat wa sai rai nga ai. Dai shaning gaw, (1922) ning December shata (17) ya shani shi a asak (90) ning rai nga ai. Slg Pu-Lu a moi mang hpe yup ku ntsa kaw tawn da ai ten, shi a manang kareen dingla wa gaw, gade n jin ngut ai raitim, abwi sha rawt sa wa nna, slg Pu-lu a moi mang hpe (3) lang gum dagup let hkung ga jaw nu ai. Ya na zawn hkung ga jaw let tsun ai gaw, “**oh,,, ngai a kahpu e, ngai hpe hkum ngam kau da, nau nna ai sha ngai hpe mung woi la rit yaw**” ngu akyu hpyi nu ai. Kaja wa mung nhtoi (10) ya din ai hte Kareen dingla wa mung si mat wa sai rai nga ai. Dai kahtawng mare buga na masha ni gaw, ndai yen gaw sumsing mungdan de arau sha hkrum na masai, nga nna, kajai gumhkawng nga ma ai. Shan a makoi mayang lamang ni mung mau na ram masha law ai lam chye lu ai. Bai nna, Yangon mare kaba na Wa Jau Panna hkum nan lak san du nna, Missa Hkungga hte makoi mayang sai lam labau shang rai nga sai. Slg Pu-Lu hpe shi a ningrum ningtau jan ai makau kaw lup makoi da sai lam shanhte a Jawng dung Jau rai nga ai Wa Jau **Michael Mee-Nyo** hkum nan ka matsing da ai hta na chye lu nga mali ai re.

Nu wa ni, ndai Wa Jau Micheal Mee-nyo gaw, Nyau-lay-byin jau ginwang sasana hpe gaw de hpang dat ai Jau mung rai nga ai. Jau gaw,

Madu a shaning (1865) ning hta Pintit Mungdan hta shangai dai daw wa sai rai nga ai. Par-ri mare na MEP Sasana majen je ai Jau wuhpung hta shang nna, Jai tai hpaji ni hpe sharin hkaja la nna, san seng san pra ai Jau tai wa sai rai nga ai. Jau tai ngut ai hpang India, Vietnam hte Myanmar mungdan a hka-ang daw hte dingda maga daw ni hta sasana magam gun lai wa sai rai nga ai. Madu a shaning (1892) ning hta Myanmar mungdan de lit shatsam hkrum nu ai. Jau sasana lit magam ang ai ginra gaw, Pe-gu mare hpe madung da nhtawm me, makau grup yin na kahtawng mare ni hkan rai nga ai. Jau Mee-nyo, Nyau-lay-byin mare de du shang wa ai shaloi, shi hpe hkap tau la na gadai mung nnga ai majaw, manam na shara nnga rai, wanleng daru na manam ni hkring sa ai jarawp kaw hkring sa la nu ai. Jau gaw, ngai nga na shara lajang la ra na re ngu, myit lu ai majaw, lamu ga shara lu na matu, Asuya de tang shawn ai shaloi, ya daini na ten anhte yawng mu lu ai, Nyau-lay-byin mare a sinpraw maga na, **Taw-ra Jawng** nga ai shara kaw lu nu ai. Dai shara gaw myo mare hte loi tsan ai re majaw, myo kata de shara tam ai shaloi, ya daini Nu Maria a poi galaw ai shara hpe lu la sai lam gam garan ya let, ngam nga ai daw hpe du na lamang hta bai hkap madat la nga ga.

**Ka lajang ai; Mama Rose Angeline Maran Nang Doi  
RVC, Ginjaw Rung, Aung Nan  
Myitkyina.**